

ւատս քրիստոնէութեան իւրոյ . ընդ այս եւս Մէլիք Ատիւ  
ոչ հաճեցաւ . և 'ի չյաջողիլ հաշտութեան , վերստին դի-  
մեցին 'ի զէն :

Սուլթանն նստէր յերուսաղէմ 'ի տունն Ագսա կոչե-  
ցեալ՝ մերձ յեկեղեցին Ս . Յարութեան , ալն ունելով  
գալստեան եգիպտական զօրաց , և մեծաւ ջանիւք փոյթ  
կալեալ էր շինել զպարիսպ քաղաքին . ընդ այս գործ ա-  
ռաքեալ էր յառաջագոյն տէրն Մուսուլայ քարահատս և  
գործաւորս իւրովք թոշակօք , յոր աշխատէին նոքա ամիսս  
իբրեւ 6 . ապա կացոյց 'ի գերեաց Լատինաց զարս իբրեւ  
2000 'ի ծառայութիւն այսր գործոյ , և նորոգեցին զմարտ-  
կոցս 'ի հիւսիսային դրանէ մինչեւ 'ի դուռն արեւմտեան .  
զի զհատեալ քարինս 'ի խրամէ անտի գնէին 'ի պարիսպն :  
Սուլթանն փութացուցանէր զգործն ստիպաւ մեծաւ հա-  
նել 'ի գլուխ , որոյ վասն բաժանեաց զայն որդւոց , եղբարց  
և իշխանաց իւրոց . ինքն լեալ անձամբ վերակացու , բառնա-  
լով զքարինս 'ի թամբս երկվարի իւրոյ , և եհան զամենայն  
բազմութիւնս քաղաքին 'ի մեծամեծաց մինչեւ ցփոքունս  
և առ հասարակ վաստակէին 'ի գործ շինութեան պարսպին .  
իսկ թագաւորն Անգղիոյ թէպէտ եւ զնացեալ էր յԱս-  
կաղոն և ձեռնարկեալ նորոգել զպարիսպ նորա , սակայն  
իշխանք Պաշակրաց ստիպէին զնա յազատութիւն Ս . Գե-  
րեզմանին , և նա առ 'ի կատարել զխոստումն իւր , դարձ  
արար անտի . եւ 'ի ամին ժամանակի մեռաւ Մարքիզն Տիւ-  
րոսի , եւ տիրեաց քաղաքին Ռիզարտոս , եւ խնդրեաց 'ի  
Սուլթանէն զկէս մասն երկրին , երուսաղէմ և ամրոցն մնալ  
'ի ձեռս այլազգեաց , բաց 'ի տաճարէն Ս . Յարութեան :  
Եւ 'ի չառնուլ յանձն Սուլթանին , արշաւեցին նոքա 'ի սահ-  
մանս եգիպտոսի , առին զբերդն Տարում , և 'ի սուր հա-  
նին զընակիչս նորին , եւ դարձան անտի ճոխ աւարաւ 'ի  
վերայ Մեճտելայ , բայց յետս վանեցան յամրականաց , և  
ոմանք մեռան իսկ , և անտի զնացին ոմանք յԱսկաղոն և  
այլք 'ի Պէյթ ծիպրիլ , և յետոյ ժողովեալ հասին 'ի Պէյթ  
Նուսէ , եւ անտի 'ի Գոլունիա՝ որ հեռի է յերուսաղէմի 2  
փարսախաւ : Ասիւծասիրտն Ռիզարտոս , որոյ յանուանէ  
իսկ սարսէին Արաբացիք , և այնպէս հաշակեալ էր համբաւ  
քաջութեան նորա , մինչ զի զկնի մահուան նորին յստնուլ